

續武陟縣志

辛未
翔九



月

續武陟縣志卷十六

武陟縣知事史延壽纂輯
武陟縣縣長王國璋參訂
武陟縣縣長田家珩參訂

耆舊傳

方志人物傳至不一矣而要無非表前賢以式後進前志
於先賢外擇其惇德修義與宦績文藝之可稱者別爲耆
舊傳俾庸庸者有所興起用意亦至勤矣及觀其著錄多
所未稱且有與義行相混者又何其舛也數十年來山川
之所鍾毓英傑輩出如原道明黃聘翁之道德毛倉侍文
達父子之勲業王六吉少白父子之學問苗配山毛子遇

之文章皆卓然表見於世而非所謂一國之士者詩曰高山仰止景行行止今詳其實以續耆舊傳覽斯編者諒必有睎然而奮興者矣

明

王麟字兆瑞邑西興隆岡人事親至孝習武藝洪武十九年鄭藩端清世子選授世襲雲騎尉旋薦至京師佐大將軍馮勝討元太尉納克楚於金山大勝斬平章郭勒擒其子布喇奇陞本所千戶又佐大將軍藍玉襲破元特古斯特穆爾於捕魚兒海獲其次子廸保努及妃王以下百餘人官屬及子女馬駝無數奏捷陞明威將軍府指揮僉事

父母俱膺封贈

清

苗于京字配山世居邑西之大封村祖培初父琅並以行
誼著入前志孝友傳先生生有至性孝友稱族黨間母早
逝繼母慈愛頗疏先生事之雖謹卒無間言讀書過目輒
不忘學極淵博經史傳記天文地輿以及醫卜星相圖譜
金石之類靡不淹貫爲文章堅確蒼老雖絕駟麗之習而
仍覺珠玉燦然中雍正壬子鄉試經魁計偕入都與方靈
皋遇京邸談論文學雅爲方公所重會修邑乘任採訪事
於前賢多所表章又訂正苗氏族譜精密簡當大族講譜

學者多倣其義例晚年由博返約事能前知一生博學異識爲遠近所稱雖婦孺童稚咸號爲苗書箱云著述多散佚惟十三經先聲及溫縣志尙存

申一乾字連三號晴川甯郭鎮人幼聰慧讀書數行並下七歲卽解吟咏成童入庠旋食廩餼以乾隆辛酉貢士肄業國學三年補授祥符訓導遵胡安定法設經義治事二齋以振勵實學諸生學益進陳州大饑藩憲某公委先生往賑至陳杜吏胥侵冒民得實惠賴以不死者數萬人後改補新鄉訓導課士一如在祥符時年七十三以老致仕歸日與門人研究性理之學作朱陸異同議以融學者門

戶之見所著學庸講義松筠堂文稿燭光錄都門草等集
今佚

何國卿號松澗蔡家莊人少有志性好讀書父客山東值
王倫反星夜奔赴父賴以安居鄉和厚負債不償者輒焚
其券弱冠入庠益攻苦於學嘗語人曰吾數年來非眠食
時皆讀書時也乾隆己酉登賢書大挑二等補尉氏訓導
待人和而介士民悅服有縣令壽辰燕客令歌者侑酒甚
褻先生拂衣起去將具稟乞休令慙再三謝乃止後卒於
官

原文會字道明駕部村人已見前志義行傳然於先生道

德學問多缺而弗詳茲並著之登諸耆舊之列焉先生著有訓子語詞意精實與諸先儒之言相出入更有柏亭集遺前載先生懿行錄碑記及諸先正爲先生立傳表墓等作後載先生詩文雜誌先生一生學行具見於此當先生易簀時鄉人卽繪像以祀旋又於本村建立專祠後又請入鄉賢祠非所謂鄉先生沒而祭於社者耶子隨鳳字翔千庠生讀書好古力求實踐著有語錄及福善禍淫圖李文清公稱其有儒者風同鳳字象三歲貢生賦性剛正末世鬼神迷信之說皆力矯之以正其謬鄉里多感而化之著有松窗偶錄河洛奧指兵法知機同心集等書連鳳字

巢閣庠生天性淡泊舉事平易近人然不可以非理干之
好讀書年八十餘手不釋卷鄉里學者多賴其陶鎔著有
語錄二卷奇門起式書尤精眼科遠近蒙其治愈者甚衆
皆能守先生之家訓云

任若海字滙川號泊齋南湖村人父育敏學行載前志耆
舊傳若海幼聰穎書過目輒成誦時河內夏用九先生方
以正學廸後進問曰論語第一個學字所學何事應曰學
事物當然之理時甫八歲用九大奇之後補博士弟子旋
食廩餼不屑屑舉子業專究心於經濟性理各書得於心
而徵諸行訂自鑑錄晝之所爲夜必書之分口過身過心

過以自檢雖小過必書以是課子弟與生徒嘗曰過日
寡則德日新不可妄立門戶以自標榜署鄧州學正課諸
生以小學近思錄爲宗故沐教者多篤行之士早失怙事
母至孝母沒每祭必泣終身如一日於姊妹兄弟友愛備
至教族人以孝弟力田而首革停喪之弊痛禮教漸微著
四禮從宜敦行以爲倡並立宗法置祭田乏者賙之不肖
者懲之薰其德而善良者指不勝屈巡撫及郡守以勤學
教士禮有五經圖其門所著又有天文地理圖綱目撮要
土音辨訛等書未刊太平圖話姓氏綜已刊卒入鄉賢祠
子蓮叔以舉人任杞縣教諭後陞知縣著知非日記深究

性命辨析異同爲當代諸名公所推賞次子蕙叔縣學優廩生亦能恪守家風罔敢少渝云

黃席珍字伯儒邑增生世居縣東黃村童時端凝厚重稍長嗜書如飢渴凡天文地理經史子集靡不徧覽尤究心於程朱之學師器之贈以詩有學術千秋繼心源一脈傳之句惟艱於遇安貧樂道設教於鄉數十年一以論語弟子職及大學八條目爲標的循循有序立論以平易簡切爲要不事穿鑿而務究精微嘗言讀書須體到自己身上聖賢千言萬語無非教我以盡性踐形而已故遊其門者舉止皆有禮法性孝友雖貧甘旨必備父母沒哀毀盡禮

嘗修族譜立家規十六條以訓族人尤重義輕財於親族體卹備至朋友有急嘗賣田以助之值歲饑勸富戶施粟並出資運糧以平市價里中貧窘之家賴以存活者無算巡撫與郡守以勵志安貧經明行修旌其門同治間入祀鄉賢祠所著有講易圖歌談心集詩未梓

王汝謙字六吉號益齋庠生世居木樂店淡庵先生子幼承庭訓篤志於學博極羣書凡天文地輿古今沿革及莊老釋典之屬靡不考究而尤專精於性理以返躬實踐爲務其言曰天以誠然之理賦之人大學謂之明德中庸謂之天性只是一團生氣貫徹於天地民物之中所謂仁也

其裁制處便是義其燦設處便是禮其貞固處便是智其
肫實處便是信存主在一心而著落在家國天下人倫庶
物之際分之則有五性合之只是一仁故孔門專務求仁
學者苟不於此著力雖讀盡羣書何益真所謂洞見本源
獨抒心得者授徒數十年後學賴以成立者甚衆事親至
孝飲食必侍如嬰兒狀病則湯藥必躬親之待弟汝愚汝
誠尤友愛病嘗與同臥起便溺皆親抱之其篤行皆人所
難故李文清公誌其墓稱爲真秀才云所著有四書記悟
孟子論文尙書管窺省過齋文鈔均見經籍志

毛樹棠字芾村世居木樂店以嘉慶二十二年進士選庶

吉士授編修道光四年大考一等二名進侍讀歷升至倉場侍郎爲人孝友恭儉躬躬然如有所循而赴義忘利之事汲汲然常恐其不逮滑賊亂時官軍掘壕於太行隄骸骨遍野公捐資督埋月餘始畢事義聲振鄉閭間從父失官死羈所孤行數百里完逋負持喪而歸族之衣食喪娶雖異居必經理之親姻之緩急必有應爲同鄉之客京師者謀館舍定規約必使可久初至倉場時有言增官役防盜米者公謂無益於防弊而弊隨人增奏寢之然於漕事之發斂有可以防奸絕弊者躬無不親心無所不自盡也公學問淹貫研精三禮及古文詞尤工書法翰墨流傳海

內宗仰因病告歸道光二十五年卒上元梅伯言先生誌其墓

毛登雲字似千號拙齋世居縣東黃黍村父占魁歲貢生入前志孝友傳登雲生有至性年十四遭母喪哀痛如成人祖病癱瘓垂十稔隨父侍湯藥無少怠事父先意承志家計雖窘菽水無缺從祖於臥榻間受小學性理諸書奉拳服膺寒暑弗輟弱冠入邑庠旋食餼後以恩貢終生平嚴守禮法授徒必先繩以規矩精醫術遇時疫流行隨人救濟或徒步往返連日夜不得眠無倦色俗每棄殤子於野任犬豕踐食先生慘然曰慈孝一也親死則棺之槨之

子死則以食犬豕是無人心也見輒掩之作瘞殤文以示
戒子鴻印鴻順次第舉於鄉鴻順成進士令湖北手書六
事俾懸座右以爲警故鴻順所至有政聲云

申其蘊號禺亭由恩貢就職直隸州州判借補教諭幼聰
穎善讀書年八歲稱神童焉及長博學能文喜吟咏並有
胆畧道光丁未歲大祲飢民相聚爲盜鄉里患之議請兵
勦滅其蘊力持不可設法籌賑又親入盜穴勸散之竟得
無事晚年杜門讀書益研究濂洛關閩之學而躬行之設
帳授徒多所成就著有素果堂自嬉集各詩稿

孫應照字吉菴木樂店人狀貌魁岸多膂力少習武功中

道光乙酉武舉聯捷成進士以本班回籍候選自以目不
知書他日或不堪事乃日袖論孟小學及孫吳武經等書
就質於先生長者前數年皆通其意又豫詢營伍利弊與
軍政得失綦詳故入仕途官事敏練若已經無扞格者癸
巳選授貴州水城營守備旋遷都司庚子勦逆夷於鳳凰
崗身先士卒剗中左手右股不爲動大府壯之薦陞湖南
副將護理提督新寧逆匪滋事奉檄堵拿潛躡賊踪冒雨
直進力戰三日獲其首逆以功補授永州鎮總兵聲震楚
南居無幾粵西盜起與永州接壤嚴督弁兵分守各隘自
率親丁巡視晝夜不遑息以馬爲牀者幾三年卒以兵力

不敷奪官歸卒於家無子以弟子國瑞嗣焉

申逢庚字劍光號晴嵐甯郭鎮人以歲貢生用訓導學者稱劍光先生幼體弱爲大父所鍾愛故就傅稍遲十三歲始立志讀書數年間經史子集默識殆盡詩古文詞而外兼及時藝授徒以德性培其本以問學暢其支成就後學極衆所著北窗雜記十餘卷博洽貫通蓋畢生精力所萃者惜未梓行

秦焯字德裕馬營人由生員捐授唐縣訓導大吏知其能委充十三縣團長以守城功蒙團練大臣毛保加光祿寺署正銜撫院鄭保以知縣用在任候選性淡於榮利遽引